

სსიპ

ვეტერანების საქმეთა
სახელმწიფო სამსახური

საქართველო, ქ. თბილისი 0114, გორგასლის ქ. 75
ტელ: (+995 32) 248 16 26, ელ-ფოსტა: info@veterans.gov.ge



LEPL

State Service of
Veterans Affairs

75 Gorgasali str., Tbilisi 0114, Georgia
Tel: (+995 32) 248 16 26, E-mail: info@veterans.gov.ge



SSVA 00008343



06/05/2020

საქართველოს პრემიერ-მინისტრს
ბატონ გიორგი გახარიას

ბატონო გიორგი,

განსახილველად წარმოგიდგენთ „9 მაისის - ფაშიზმზე გამარჯვების 75-ე წლისთავისადმი მიძღვნილი ღონისძიების შესახებ“ საქართველოს მთავრობის განკარგულების პროექტს.

დანართი: 4 (ოთხი) ფურცელი.

პატივისცემით,

სსიპ ვეტერანების საქმეთა სახელმწიფო სამსახურის
დირექტორი ვლადიმერ იმნაძე



გამოყენებულია კვალიფიციური
ელექტრონული ხელმოწერა/
ელექტრონული შტამპი



საქართველოს მთავრობის
განკარგულება
№ 2020 წლის ქ. თბილისი

9 მაისის - ფაშიზმზე გამარჯვების 75-ე წლისთავისადმი მიძღვნილი ღონისძიების შესახებ

„საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონის მე-5 მუხლის „ა“, „ლ“ და „ჰ“ ქვეპუნქტების, მე-6 მუხლისა და „საქართველოს 2020 წლის სახელმწიფო ბიუჯეტის შესახებ“ საქართველოს კანონის შესაბამისად:

1. ფაშიზმზე გამარჯვების 75-ე წლისთავის აღსანიშნავი ღონისძიებების ფარგლებში დაწესდეს ერთჯერადი ფულადი სოციალური დახმარება მეორე მსოფლიო ომის მონაწილეთათვის 600 ლარისა და მეორე მსოფლიო ომში დაღუპულთა ოჯახების წევრთათვის 300 ლარის ოდენობით.

2. მეორე მსოფლიო ომის ყველა მონაწილე დაჯილდოვდეს საიუბილეო მედლით - „ფაშიზმზე გამარჯვების 75 წელი“.

3. საჯარო სამართლის იურიდიულმა პირმა - ვეტერანების საქმეთა სახელმწიფო სამსახურმა (შემდგომში - სამსახური) უზრუნველყოს მეორე მსოფლიო ომის მონაწილეთათვის საიუბილეო მედლის „ფაშიზმზე გამარჯვების 75 წელი“ გადაცემა.

4. ამ განკარგულების პირველი პუნქტით გათვალისწინებული ერთჯერადი ფულადი სოციალური დახმარება არ გაითვალისწინება „ქვეყანაში სიღატაკის დონის შემცირებისა და მოსახლეობის სოციალური დაცვის სრულყოფის ღონისძიებათა შესახებ“ საქართველოს მთავრობის 2010 წლის 24 აპრილის №126 დადგენილებით გათვალისწინებული „სოციალურად დაუცველი ოჯახების მონაცემთა ბაზაში“ რეგისტრირებული/რეგისტრაციის მამიებელი ოჯახ(ებ)ის შემოსავლებში და არ არის ფულადი სოციალური დახმარების - საარსებო შემწეობის შეჩერების/შეწყვეტის ან/და ოჯახის სოციალურ-ეკონომიკური მდგომარეობის ხელახალი გადამოწმების საფუძველი.

5. საქართველოს მთელ ტერიტორიაზე (გარდა ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრებისა) ერთჯერადი ფულადი სოციალური დახმარების გაცემა უზრუნველყოს საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებულმა საჯარო სამართლის იურიდიულმა პირმა - სოციალური მომსახურების სააგენტომ (შემდგომში - სააგენტო) სახელმწიფო სოციალური შინაარსის ფულადი გასაცემლების გაცემაზე/დარიგებაზე მომსახურე შესაბამისი საბანკო დაწესებულების მეშვეობით, ამ განკარგულების მე-7 პუნქტის „ა“ ქვეპუნქტის შესაბამისად მიწოდებული სიის საფუძველზე. სააგენტო დამატებით უზრუნველყოფს მონაცემების (სახელი, გვარი, პირადი ნომერი) შედარებას საქართველოს იუსტიციის სამინისტროს სახელმწიფო კონტროლს დაქვემდებარებულ საჯარო სამართლის იურიდიულ პირის - სახელმწიფო სერვისების განვითარების სააგენტოს მიერ მიწოდებულ მონაცემთა ბაზასთან, 2020 წლის პირველი მაისის მდგომარეობით ცოცხლად მყოფ პირთა დაზუსტებისა და ამ პირებზე სოციალური დახმარების გაცემის მიზნით.

6. ამ განკარგულების პირველი პუნქტით გათვალისწინებული ღონისძიებების დაფინანსება (გარდა ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრებისა) განხორციელდეს „საქართველოს 2020 წლის სახელმწიფო ბიუჯეტის შესახებ“ საქართველოს კანონის 30-ე მუხლის მე-5 პუნქტის „თ“ ქვეპუნქტის საფუძველზე, საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროსათვის გათვალისწინებული „მოსახლეობის მიზნობრივი ჯგუფების სოციალური დახმარების“ პროგრამის (პროგრამული კოდი: 27 02 02) ასიგნებიდან.

7. სამსახურმა არა უგვიანეს 2020 წლის 8 მაისისა:

ა) სააგენტოს მიაწოდოს საქართველოს მთელ ტერიტორიაზე რეგისტრირებული (გარდა ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრებისა). მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრების სახელობითი მონაცემები;

ბ) ქ. თბილისის მუნიციპალიტეტის მერიას მიაწოდოს შესაბამისი სახელობითი მონაცემები ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრების შესახებ.

8. ეთხოვს ქ. თბილისის მუნიციპალიტეტის მერიას, უზრუნველყოს ქ. თბილისში რეგისტრირებული მეორე მსოფლიო ომის მონაწილეებისათვის 600 ლარისა და მეორე მსოფლიო ომში დაღუპულთა ოჯახების წევრებისათვის 300 ლარის ოდენობის ფულადი დახმარების გაცემის მიზნით შესაბამისი სახსრების გამოყოფა.

პრემიერ-მინისტრი

გიორგი გაბარია

განმარტებითი ბარათი

„9 მაისის - ფაშიზმზე გამარჯვების 75-ე წლისთავისადმი მიძღვნილი ღონისძიების შესახებ“ საქართველოს მთავრობის განკარგულების პროექტის თაობაზე

ინფორმაცია განკარგულების პროექტის თაობაზე

წარმოდგენილი განკარგულების პროექტის მომზადების მიზანია 9 მაისის - ფაშიზმზე გამარჯვების 75-ე წლისთავისადმი მიძღვნილი ღონისძიების განსაზღვრა და საქართველოში მცხოვრები მეორე მსოფლიო ომის მონაწილეებისა და მეორე მსოფლიო ომში დაღუპულთა დამსახურების გათვალისწინებით, ღირსშესანიშნავი თარიღის აღნიშვნა.

წარმოდგენილი პროექტი ითვალისწინებს ფულადი დახმარების გაცემას მეორე მსოფლიო ომის მონაწილეებისათვის 600 ლარის და მეორე მსოფლიო ომში დაღუპულთა ოჯახების წევრებისათვის 300 ლარის ოდენობით. საქართველოს მთელ ტერიტორიაზე (გარდა ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრებისა) ერთჯერადი ფულადი სოციალური დახმარების გაცემას უზრუნველყოფს საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებული საჯარო სამართლის იურიდიული პირის - სოციალური მომსახურების სააგენტო, „საქართველოს 2020 წლის სახელმწიფო ბიუჯეტის შესახებ“ საქართველოს კანონის 30-ე მუხლის მე-5 პუნქტის „თ“ ქვეპუნქტის საფუძველზე, სამინისტროსათვის გათვალისწინებული „მოსახლეობის მიზნობრივი ჯგუფების სოციალური დახმარების“ პროგრამის (პროგრამული კოდი: 27 02 02) ასიგნებიდან, ხოლო ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრებისათვის - ქ. თბილისის მუნიციპალიტეტის მერია, ქ. თბილისის მუნიციპალიტეტის 2020 წლის ბიუჯეტის ასიგნებებიდან.

წარმოდგენილი განკარგულების პროექტი ფულადი დახმარების გაცემასთან ერთად ითვალისწინებს მეორე მსოფლიო ომის მონაწილეებისთვის საქართველოს მთავრობის 2020 წლის 19 მარტის №573 განკარგულებით დამტკიცებული საიუბილეო მედლის - „ფაშიზმზე გამარჯვების 75 წელი“ და მისალოცი ბარათების გადაცემას. წარმოდგენილი განკარგულების პროექტი, საქართველოში ახალი კორონავირუსის გავრცელებასთან დაკავშირებით შექმნილი მდგომარეობიდან გამომდინარე, არ ითვალისწინებს ხალხმრავალ საზეიმო ღონისძიებებს.

ინფორმაცია ევროკავშირის სამართლებრივი აქტის შესახებ

წარმოდგენილი პროექტის მომზადებისას ევროკავშირის შესაბამისი სამართლებრივი აქტი გამოყენებული არ არის.

პროექტის მიღებით გამოწვეული საფინანსო-ეკონომიკური შედეგების გაანგარიშება

განკარგულების პროექტის მიღება სახელმწიფო ბიუჯეტიდან დამატებითი ფინანსური სახსრების ხარჯვასთან დაკავშირებული არ არის.

პროექტის მიღება არ ითვალისწინებს სახელმწიფოს მიერ ახალი ფინანსური ვალდებულებების აღებას.

არსებული მდგომარეობით სსიპ - ვეტერანების საქმეთა სახელმწიფო სამსახურის ელექტრონულ მონაცემთა ბაზაში საქართველოს მასშტაბით რეგისტრირებულია 372 მეორე მსოფლიო ომის მონაწილე (მათ შორის ქ. თბილისში რეგისტრირებულია 149 პირი) და მეორე მსოფლიო ომში დაღუპულის ოჯახის 227 წევრი (მათ შორის ქ. თბილისში რეგისტრირებულია 51 პირი).

შესაბამისად, წინამდებარე განკარგულების პროექტით გათვალისწინებული ფულადი დახმარების ოდენობის პირობებში, საქართველოს მთელ ტერიტორიაზე (გარდა ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრებისა) საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროსათვის გათვალისწინებული საბიუჯეტო ასიგნებებიდან გასაცემი ერთჯერადი ფულადი სოციალური დახმარების საერთო ოდენობა შეადგენს 186 600 (ას ოთხმოცდაექვსი ათას ექვსასი) ლარს, ხოლო ქ. თბილისში რეგისტრირებული მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების წევრებისათვის ქ. თბილისის მუნიციპალიტეტის ბიუჯეტის ასიგნებებიდან გასაცემი თანხის საერთო ოდენობა შეადგენს 104 700 (ასოთხი ათას შვიდასი) ლარს. წარმოდგენილი პროექტით გათვალისწინებული ერთჯერადი ფულადი სოციალური დახმარების საერთო ოდენობა შეადგენს 291 300 (ორას ოთხმოცდათერთმეტი ათას სამასი) ლარს.

პროექტის მოსალოდნელი შედეგები

საქართველოს მთავრობის წინამდებარე განკარგულების პროექტის მიღების შემთხვევაში უზრუნველყოფილი იქნება საქართველოში მცხოვრები მეორე მსოფლიო ომის მონაწილეებისა და მეორე მსოფლიო ომში დაღუპულთა ოჯახების დაფასება და მათი დამსახურების სათანადოდ აღნიშვნა.

პროექტის განხორციელების ვადები

პროექტის ამოქმედება უნდა განხორციელდეს ხელმოწერის დღიდან.

პროექტის ავტორი და წარმდგენი

განკარგულების პროექტის ავტორი და წარმდგენია სსიპ - ვეტერანების საქმეთა სახელმწიფო სამსახური.